

## Taliadau a threuliau ymddiriedolwyr

Gall taliadau a threuliau ymddiriedolwyr fod yn bwnc dryslyd ond yn un y mae ymddiriedolwyr yn amlwg am gael yn gywir. Mae'r erthygl hon yn bwrw golwg byr ar y pwnc. Os oes angen rhagor o wybodaeth arnoch, gweler canllaw y Comisiwn [CC11: Treuliau a thaliadau ymddiriedolwyr](#)

### Treuliau

Gall ymddiriedolwyr elusen hawlio treuliau ac nid oes rhaid i hwn gael ei awdurdodi yn nogfen lywodraethol yr elusen neu gan y Comisiwn. Fodd bynnag, argymhellir bob amser bod polisi treuliau ysgrifenedig gan elusennau y mae pob un o'r ymddiriedolwyr yn ei ddeall.

### Taliadau ymddiriedolwyr

Er mwyn talu ymddiriedolwr, mae'n rhaid cael awdurdod. Gall yr awdurdod hwn gael ei nodi yn nogfen lywodraethol yr elusen, gall fod yn bŵer statudol neu gall y Comisiwn Elusennau ei roi.

Felly, y cam cyntaf yw ystyried pa fath o daliad gaiff ei wneud.

- Ydy'r elusen yn talu ymddiriedolwr am wasanaeth neu a fydd yr elusen yn cyflogi ymddiriedolwr?

Y cam nesaf yw edrych ar ddogfen lywodraethol yr elusen.

- Beth mae'r ddogfen yn ei ddweud am dalu ymddiriedolwyr?

#### *Talu ymddiriedolwyr am nwyddau a gwasanaethau*

Efallai na fydd dogfen lywodraethol yr elusen yn cynnwys unrhyw gymalau ar daliadau ymddiriedolwyr neu efallai ei bod yn datgan bod modd rhoi taliadau gyda chydysyniad y Comisiwn. Yna gallwch chi ddibynnu ar y pŵer statudol i dalu ymddiriedolwyr am nwyddau a gwasanaethau. Nid oes angen cael cydsyniad y Comisiwn i wneud y taliad hwn ond mae'n rhaid bodloni rhai amodau (wedi'u rhestru yn y canllawiau uchod).

Os yw dogfen lywodraethol yr elusen yn datgan na all unrhyw daliadau gael eu gwneud i'r ymddiriedolwyr, ni allwch ddibynnu ar y pŵer hwn i dalu ymddiriedolwyr am nwyddau a gwasanaethau. Efallai y gallwch chi newid eich dogfen lywodraethol ac mae canllawiau ar wefan y Comisiwn ar y mater hwn.

#### *Cyflogi ymddiriedolwr*

Os yw dogfen lywodraethol yr elusen yn datgan bod modd i'r elusen gyflogi ymddiriedolwr, nid oes angen cael cydsyniad y Comisiwn ar gyfer y gyflogaeth hon.

Fodd bynnag, gall y ddogfen lywodraethol ddatgan bod angen cael cydsyniad y Comisiwn a bydd rhaid i chi wneud cais am hwn drwy ffurflen ar-lein (rhagor o wybodaeth isod).

Weithiau bydd y ddogfen lywodraethol yn datgan nad oes modd talu ymddiriedolwyr elusen. Unwaith eto, efallai y gallwch chi newid eich dogfen lywodraethol ac mae canllawiau ar wefan y Comisiwn ar y mater hwn.

### *Ffurflen ar-lein ar gyfer taliadau a threuliau ymddiriedolwyr*

Mae ffurflen ryngweithiol ar-lein newydd gan y Comisiwn ar gyfer pob math o daliadau ymddiriedolwyr. Mae'r ffurflen hon yn eich tywys drwy nifer o gwestiynau i chi gael gwybod a allwch dalu ymddiriedolwr. Ar y diwedd, cewch wybod a oes angen cydsyniad y Comisiwn i roi'r taliad a gofynnir i chi anfon y ffurflen. Fodd bynnag, os nad oes angen cydsyniad y Comisiwn fe gewch dystysgrif i'w hargraffu a fydd yn rhoi sicrwydd i'r elusen bod y taliad yn gyfreithlon. Mae dolen i'r ffurflen i'w gweld isod.

[http://www.charitycommission.gov.uk/welsh/Manage\\_your\\_charity/making\\_payments.aspx](http://www.charitycommission.gov.uk/welsh/Manage_your_charity/making_payments.aspx)

### **Gweithredu er lles gorau'r elusen**

Pan fydd elusennau'n talu ymddiriedolwyr mae'n rhaid iddyn nhw ystyried a yw'r taliad er lles gorau'r elusen. Mae'n bwysig i reoli, a chael eich gweld eich bod yn rheoli'r gwrthdaro buddiannau sy'n codi drwy fod yn agored ac yn atebol i'r rhai sydd â budd yn yr elusen. Gweler hefyd canllaw'r Comisiwn ar [wrthdaro buddiannau](#).